

## Иисус Христостун төрүттүнгени

1 Ол үеде Август каган Рим күрүнезиниң бүгү девискээринге чоннуң чизезин кылыр дугайында чарлык үндүргөн. 2 Сирияны Квирийниң чагырып турган үезинде кылган баштайгы чизе ол болган. 3 Кижиге бүрүзү бодунуң төрүттүнгөн черинге барып данзыладыры-биле чоруур ужурга таварышкан. 4 Давидтиң ук-ызыгуурундан үнгөн болгаш, Иосиф база-ла Галилеяның Назарет дээр хоорайжыгажындан Давидтиң хоорайжыгажы болур Вифлеемче чорупкан. 5 Дүгдешкен душтуу болур, ынчан иштиг турган Мария-биле кады чизеледир дээш, Иосиф чорупкан чүве-дир. 6 Вифлеемге кээрге, Марияның божуур ай-хүнү үнүп келген. 7 Ол бодунуң дун Оглун божааш, Ону чөргөп-шарааш, мал чемгерер шагжага салып алган, чүге дээрге хоначалар бажыңындан оларга чыдар чер тывылбаан. 8 Ол чер чурттуг кадарчылар ырак эвес шөлге, кодан хойларын харагалзап, хонуп чытканнар. 9 Хенертен оларның мурнунга Дээрги-Чаяакчының төлээзи көстүп кээрге база ону бүргээн Дээрги-Чаяакчының чырыы оларны хөмө чырыдыптарга, кадарчылар медээжок корга бергеннер. 10 Ынчалза-даа дээрниң төлээзи оларга мынча дээн: «Кортпаңар. Мен бүгү улуска хамааржыр улуг өөрүшкү дугайында Буянныг Медээни силерге дыңнадып тур мен. 11 Силерниң Камгалакчыңар, Дээрги-Чаяакчы Христос бөгүн Давидтиң хоорайында төрүттүнгөн-дир! 12 Силерге бадыткал демдээ бо-дур: чөргөп-шарааш, мал чемгерер шагжада салып каан чыдар Чаш төлдү тып алыр силер». 13 Хенертен дээрниң ол төлээзинге эндерик хөй дээрниң аг-шерии катчып келгеш, Бурганны алдаржыдып эгелээн: 14 «Дээрде саадаан Бурганга алдар! Ооң сеткилинге кирер нерниң бүгү кижилеринге амыр-тайбың догунназын-на!» 15 Дээрниң төлээлери оларны каггаш, дээрже көдүрлүп үнө бээрге, кадарчылар аразында мынчаар сүмелешкен: «Дээрги-Чаяакчы бистерге бо чүнүң дугайында чугаалаан ирги, Вифлеемче ам дораан баргаш, ында чүү болганын көрүп көрээлем». 16 Олар ынаар дүвү-далаш чеде бергеш, Марияны,

Иосифти база мал чемгерер шагжада чыткан Чаш төлдү тып алганнар. 17 Олар Ону көргөш, Чаш төлдүң дугайында оларга дээрниц төлээзи чүү дээнин тө каап бергеннер. 18 Дыңнаан улус шуптузу кадарчыларның чугаазын кайгап ханмаан. 19 А Мария ол бүгүнү бодунуң чүрээнге кадагалап алгаш, ол дугайында бодап турган. 20 Оларга чугаалааны олчаан кылдыр бүгү чүвени көрүп база дыңнап алганы дээш, Бурганны алдаржытпышаан база мактавышаан, кадарчылар ээп чана бергеннер.